

SĄSADZE

Taczi nôlepszi sąsôd to ten, co to gò nigdë ni ma, a czej ju je, to le tej – czej je pòtrzëbny. Pòmòże taczi sąsadce tasze wniesc. Sniëg òd-garnie spòd brómë. Czasã co pò sąsedzkù doma ùprawi. Trôwa zesecze swòją wiôlgã maszinã. Pòd-wieze swòjim nowim audi chòc z 50 métrów. Młotk-pòzëczi. Gózdz wbije w scanã pòd òbròz nowégò prezydenta. (Òni są tak na òtmianë: z wãså i bez wãså). Zelëskò równo z plotã zestrzëze. Nie klapie. Nie zazdroscy. Nie czerëje sã, co sąsadze doma a na òbòrze robiã. Nie napùszczò kòta, co szczu do cëzégò ògròdka. Nie slëchò głòsno mùzyczi w nocë, a jak robi rozegracjã, to sąsada téz zaprosy. Sąsôd idealny. Òkróm taczych super, prima i ekstra są téz jiny. Chcemë przeanalizowac jich czile zortów.

KLAPÉTNICA PÒ MENOPAŬZE

Żëwi òbròz – sedzy w òk-nie a wëzërò na lëdzy bûten. Widzy, co chto mô òblokë, czej jidze dò kòscoła. Chto kògò kòchò, kòchòt abò jesz bądze miòt ùdbã na kò-

chanié. Wiedno mô dobrã radã i wszëtkò wié nôlepi. Że w Smòleńskù bëto ÙFÒ. Że przizë jajów spadë. Czedë bądze kòl nas ksãdz z kòlãdã a czedë smiecòrze przëjadã. Że w wòdze są żëwë bakterie. Ò jaczi sąsôd wròcò w nocë i wierã téz czemu. Że terò leno pancerné fiatë cëchò-cenkò robiã. Jakò mdze pògòda i że prawie na nasze pòle nie mdze padòt deszcz. Za co kòmù kara bòskò, że młodi są taczi niewëchòwóny, bò mùsza stojec w elektriszu bez dwie pòzdòwczu. Dobrze wié, co Seckòwò Bronia dostała za pòkùtã i jacze miała w lëpińcu grzëchë. I to nié le te smiertelné.

TERORISTA PRZED ANDROPAŬZĄ

Jegò dzecë są nôlepszë na swiece i wiedno ò tim mù-szi kòzdémù rzec. Przë leznoscë sã pòchwòli, dze w swiece na ùropë jezdy. Pewno jesz le mù planéta Mars òsta do òdwiëzeniò. Mô nôlepszë na swiece aùto a chëcz. Kùpił sobie wiòldzi mòtòr, cobë para-dowac prawie przed mòjim òknã we wszëternòstczë mòje dwie w rokù wòlné sobòtë. Jezdy na rëbë, a jak ju co złowi, to nigdë nie je to mniészë jak wie-lorib. Psu chiba pedikirë robiwò a na lekcje spiëwù gò wòzy. Je fësy, ale mô zarostã klatã, co jã chãtno pòkòzywò. W ògròdkù samé egzotyczné roscënë, leno baòbab sã jesz nie chce zmiescëc. Wëmëslnë zwierzãta zdajã w chëczë. Znije i dësëcelë w tera-

riach. Piranie i delfinë w akwariach a sztrusë i kòlibrë w wòlierach. Gwëсно téz dobré dëszczi donòszajã mù do gãbczi a òd rzëcczi òdnòszajã.

CĚSZIKÒTK PÒSPÒLITI


W garażu òpòcuszkù ferrari skłòdò. Òb noc przemi-szlò, jak zbawic swiat. Jak ùretac gò przed smògã, smrodã, òzonã czë jinym smòkã. Mô profil na fejskù a kònto na jutiubkù. Ò pòt szòsti reno pies wëpròwò-dzò gò na szpacérã. Ùczy sã sąsòdzëskò lëstë do spròwianiò na pamiãc, a przë kasy colemałò wiedno co mù wëpòdò z kòszika. Lubi òbùwac adidasë a dresë. Mô lóz bûksë a wëpòlonã na skòrze rózã na prawim jikrze. Czëtò Gómbrowicza a Gòłãbka. W nie-dzelã jé praznicã z gãsëch jajów z fëczkã. Kùpił witròz ze swiãtim Cëszikòtã do no-wégò kòscoła. Czej je ner-wës – héklëje serwetã na stoliczk, dze stojã trzë dwamétrówë słuńcowniczi w zachnym wazonie.

MĚMKA WIELEETATOWÒ

Dlò ni na 100% wëmëslëlë 500+. Wiedno w rëzë. Jedze swòjim mòtim blaszanym do krómù, jedze do szkòtë. Pò dzecë. Z dzecoma. Do biblioteczi. Na zajãca z ro-bieniò lëmionëch fligrów. Na trãbkã, sax a pianinowë ùczbë. Do doktora: zãbiòrza, internistë, laringòloga, pùlmònologa, alergòloga, jesz ze trzech-logów i zno-wù do... ginekòloga. Òdwiëdzò leno dobré krómë. Tòno mô tu, tòno mô tam. Znò wszëtczë msze dlò dzecy w òkòlim. Sztridëje sã ze szkòlnã. Dzejò w ra-dzëznie rodzyców. Ùpiecze, ùwarzi, ùszmòrëje a za-grzeje. Wiãze ceplë strëfle. Lekcje z dzòtkama robi. I jesz sã do te ùsmiëchò. Dzecë z òsedla baro lubiã memkã wieleetatawã. A òna przed krótczim spikã lubi òbzerac „Kriminalné wëzgòdzczi Las Vegas”.

A czedë sąsôd je brëkòwny? Czej pòtrzëbnò je pòmòc sąsedzkò? Je ò tim w jedny kabaretowi spiëwie: *Czedë statk kùpiony nowi a instrukcjò pò niemieckù; czej twój chłòp kãsk nagòlony i duńc do-dóm nie je letkò; czedë solë zafelëje, kilo mączu, sklónkã cëkru; czedë aùtòt w smioce stoi a jesz w kòle ni ma lëftu; czedë brifka pòt dnia klepie – nie chcã wpùscëc chłòpa z rentã; czej sã wòda w chëczi leje – w rórze dzurã sztopac przëszlò; czej pòsobny rok za régg nie chce sã ùrodzëc dzeckò – pòmòc są-sedzkò!*

TÒMK FÓPKA



Taczi nôlepszi sąsôd to ten, co to gò nigdë ni ma, a czej ju je, to le tej – czej je pòtrzëbny.